

797 amoris affectus me optima tibi<sup>a</sup> suadere cogit. Aequum est, ut, quod caritas libenter  
ante Aug. impendit<sup>b</sup>, humilitas<sup>c</sup> gratanter accipiat.

Summa Dei pietas multis feliciter annis

Conservet caros teque tuosque simul.

Sis memor Albini, memoret te Christus in aevum

Iam tibi perpetuum sit sine fine vale<sup>d</sup>.

5

## 125.

*Alcvinus a Leone III papa petit, ut Eanbaldo II archiepiscopo Eboracensi pallium  
tribuat.* 797 ante Aug.

*Cod. H fol. 17—18.*

*Ed. J 82.*

10

SANCTISSIMO PATRI LEONI PAPAE HUMILIS LEVITA ALCVINE<sup>a</sup> SALUTEM.

Anno priore<sup>1</sup> per Angilberctum<sup>2</sup>, filium eruditionis nostrae, virum prudentem et omnibus amicis fidelem et sanctae Dei ecclesiae profectui valde devotum, vestrae beatissimae paternitatis familiaritatem depraecatus sum, quatenus me quasi filium proprium intra gremium benedictionis apostolicae colligeres. Qui revertens valde a vestrae auctoritatis almivola pietate hanc meam petitionem benignissime susceptam asseruit. Unde ego totus gaudio delibutus, totus laetitia affectus, felicem me tantae paternitatis communione arbitratus sum<sup>b</sup>.

15

At nunc, veridicae promissionis vestrae fiducia animatus, his parvitatibus meae litterulis vestram appellare sanctitatem nominisque nostri in spiritalibus sanctissimi cordis vestri tabulis renovare<sup>c</sup> memoriam, ne inter excellentiores vilescat personas, si saepius oculis non ostendatur in carta. Merces est pastoris multiplicatio gregis. En ego, morbidum peccatis pecus, ad tuas, beatissime pastor, recurro consolationes; obsecrans, uti me intercessionem tua apud eum adiuves, qui me sanguine suo liberavit.

20

Iac. 5, 16. 'Multum enim' iuxta Iacobum apostolum 'valet depraecatio iusti'. Igitur ad unam  
4. Reg. 20, 6. praecem ter quinos Deus regi superaddidit annos<sup>3</sup>.

25

Sed et pro his missis — qui de patria mea<sup>4</sup> venerunt et civitate mea<sup>5</sup>, more canonico atque apostolico beati Gregorii praedicatoris nostri praecepto sacri pallei depraecari dignitatem<sup>6</sup> — humiliter vestrae pietatis excellentiam obsecro, ut benigne ecclesiasticae necessitatis accipias postulationes. Quia valde illis in partibus sacri pallei auctoritas necessaria est ad opprimendam improborum perversitatem et sanctae ecclesiae auctoritatem conservandam. Idcirco, pater sanctissime et pastor optime, tuae paternitatis miserere filiis, et multiplica gregem tibi a deo Christo commissum; quatenus cum multiplici laboris tui fructu gloriosus appareas in conspectu domini nostri Iesu Christi.

30

35

<sup>a</sup>) optimati T\*. <sup>b</sup>) impendit T\*. <sup>c</sup>) humilitatis H. <sup>d</sup>) decus T\*.

125. <sup>a</sup>) Alcuī H. <sup>b</sup>) sum addidit J. <sup>c</sup>) audeo excidisse videtur J.

1) 796; v. ep. 94 supra p. 138. 2) abbatem S. Richarii Centulensem. 3) Cf. supra p. 44 n. 2; *Alcvinī Carmen ad Paulum* (Poet. Carol. I, 70) v. 2: Addidit Ezechiae qui tria lustra pio. 4) Northanhumbria. 5) Eboraco. 6) Eanbaldo II archiepiscopo Eboracensi, qui cum die 15. Aug. (XVIII. Kal. Sept.) 796. ordinatus esset, accepto ab apostolica sede pallio, solemniter confirmatus est VI. Idus Septembris anni 797. V. Simeon. *Dunelm. hist. de gest. regg. Angl. 796 et 797* (p. 58). J.

40